

摘藻堂四庫全書薈要

集部

欽定四庫全書薈要

集部

元詩選初集卷二十一

詳校官候選知縣臣吳甸華



欽定四庫全書薈要卷二萬三百八十一

集部

元詩選初集卷二十一 長洲 顧嗣立 編

馬祖常石田集



祖常字伯庸世為雍古部居靖州之天山其高祖
錫喇濟蘇當金季為鳳翔兵馬判官子孫因號馬
氏曾祖烏呼訥從元南伐留汴後徙光州祖常七
歲知學延祐初貢舉法行鄉貢會試皆第一廷試
為第二人授應奉翰林文字擢監察御史劾奏柄

臣特們德爾十罪罷之柄臣復相左遷開平縣尹
因欲中傷之退居光州特們德爾死乃除翰林待
制累遷禮部尚書兩知貢舉一為讀卷官尋參議
中書省事參定親郊禮儀元統初拜御史中丞轉
樞密副使辭歸起為江南行臺中丞又改陝西皆
不赴至正四年卒年六十贈河南行省右丞魏郡
公諡文貞伯庸文章宏贍而精核刮除近代南北
文士習氣而專以先秦兩漢為法與姚文公燧元

文敏公明善實相繼後先尤致力于詩大篇短章
多可傳者所著曰石田集以所居有石田山房也
浙東廉訪蘇天爵請于朝刻以行世序之曰公詩
接武隋唐上追漢魏後生爭效慕之文章為之一
變與會稽袁公蜀郡虞公東平王公更唱迭和金
石相宣而文益竒史官陳旅亦曰公古詩似漢魏
而律句入盛唐散語得西漢之體文宗嘗駐蹕龍
虎臺祖常應制賦詩尤被歎賞曰孰謂中原無碩

儒乎

都門一百韻用韓文公會合聯句詩韻

返躬操耒耜奉身寡帷幕田居水春磴城宿霜鳴柝凝
塵尚沈冥幽賞任飄泊行歌鮮同歡起舞真獨作嘯詠
氣頗雄攀躋力或弱樛木植幢蔭醜石掀獸惡心恥婦
女仁志薄遊俠諾校書揚雄官入粟卜式爵娛情愜禽
弄失意被蜂蠶佩履侍殿陛觚牘宴館閣傭童飼棧駒
賤婢占屋鵲上書願封禪監祠議嘗禘紅瓔綴花房碧

刺眉叢薄春旗天仗浮秋駕星河涸補衮子何能懷祿
我所作英名襲蓮炬貴籍謝魚鑰造謁每赧然循默譬
沃若壁蝸涎篆欹穴蟻戰壘却組繡紅縷連罨畫翠色
著卿雲翳邑屋瑞雪塗郭郭羣儒修麟經諸將宣豹略
請劔斬樓蘭傳檄喻印笮賈區紫貝粲酒鑪銀甕鏢滌
刺鱠翻砧郭索蟹就縛水戲鬪魚龍山蒐獻熊獲竒服
燕姬姹獠語滇童愕東郊買鬪雞西市賣馴鶴宛宛綠
項鳳濯濯紅頭雀豪僧佛宗開大巫鬼物託迎祥有時

和驅厲無旱虐漕粟大庾盈賦秭崇詹錯圈虎割肉喂

鞞鷹搏禽嚼荔丹貢甌閩橘顆苞沔鄂能賦皆鄒枚飛

翰盡盧駱未央曲罌罍長楊市羽繳閒棋遇笑仙雜劇

坐忘瘡飲飛頭虎毛刑官面瓜削朝儀徵魯生廟獻賓

商恪天池漾文波海島通潛壑婦功春蠶溢穡事秋田

穫器美鏤桐梓冶良鑄錢鑄街樾布虛陰觀闕翔寥廓

治廷播訓敕清邊禁剽掠窮髮炙駝蹄句麗醢熊脚詰

姦鉏大猾恤隱發深瘡靈圃白獸遊禁籞黃鵠落時方

追古治事乃繼疇昨巢槽尚羊裘葦門仍葦箔周封表
鎮望禹畫首河洛聲名惜馬纓音律辨牛鐸郎署紆銀
艾玉邸施丹腹轍浚千車馳塵盆萬馬躍碣石入渤海
太行分嶺粵士女工鞏絲王孫帶河橐清明日月懸統
正宇宙拓分行下觀風立聽上宣噩服官綺纚屬虞衡
鞞旁魄踞脯販澤國乳漣給沙漠木禾神所食石蜜刀
乃斫天樞夾杓垣日畿絡雄莫鼎豈以金鑄山豈以銅
鑿戴憑席重重周舍言諤諤錫宴屬在鎬咸秩亟祠霍

造邦象邵室立法簡漢約吾生類鳧鷖賤跡雜兔狝囊

書爛星芒匣劔瑩霜鏐雨耕稗頻耨月斲石或搏尋真
養三芝求方問五藥傳竒存山經輿地指井絡悠悠秋
翦菘晏晏春食藿親歡戲假面客至樂吹簫恃才頗優
游使酒漸諧謔山深木敷榮野迴鶴寂莫擔簦踏槐黃
疊袂聯棣萼移官居旂常職領專錚鏘遮塵帽頂席隨
俗屋蓋翦俸錢具菹醢飲餃嘗膾臠孤危衆易傾獨立
古難卓徒跣防毒蛇空拳困狂狻出弊季子裘入舍居

士屨海運知化鷗泥蟠見屈蠖門高譽荀龍才逸薦禰
鷲逍遙投壺歌慷慨擲骰噓有興即騎行無疑豈龜灼
俎豆觀揖讓賓介謂獻酢風櫺李涵冰日幌櫻衰酪鄰
饑馬通爨市醉羊屠釀耘德鈔礪刃稱藝弩引彊任情
受世疵肆志探古博奏賦始中程諫獵終失度不念嫠
恤緯已謂童舞勺寢興避彈射周折準規彘襍被丘中
琴揚舫池上酌桐孫迸空枝竹穉穿石籜南翁日種漆
北地日產柞蓄厚用不躡材衆工豈格甘泉祠猶清西

河居乃索菁莪採衢謠湛露興徒号帝仁載大輿臣詩

埒微燭史官詳纂記儲以掩甕粕

自注詩中有三字非元韻蓋祖常荒學不

能用古韻故也延祐五年八月作

壯遊八十韻

十五讀古文二十舞劒器馳獵溱洧間已有丈夫氣
裹糧上嵩高靈竒發天祕熒熒三秀芝為我擢祭翠空青
丹銀品伏龜鏤文貝駢羅星辰精附麗日月會紫鳳友
朱鷺翩翩劇翔戲飛閣舒鳥翼懸泉瀉珠琲磨崖見古

刻應是列仙記捫蘿欲登觀苔滑阻凌厲煙霞蒼蔚
霧雨蕭颯至余時戴擇冠綠壁照縞袂檀藥有磐石真
人每同憇北臨黃河水濁流觸天沸蛟龍逐鼉鼉鱗介
滿水裔衝波崩金隄萬夫廢穡事官家憂其勞玉馬歲
沈祭江淮畫鷁船夜上訶嘒魚鹽不直錢寡婦豈拾
穗釀酒相呼飲顛倒再拜跪中心忘嗔訶縱談詆漢魏
三十能歌詩鄙薄雕蟲技不肯學仕宦慷慨負高義持
錢送酒家觴至即一醉羹芼懈谷筍飯煮山陽稌莪冠

擬魯儒短衣真楚製遠行探禹穴六月剖丹荔巫峽與
洞庭彷彿蒼梧帝三吳震澤區幼婦蛾眉細唱歌攪人
心不可久留滯沿淮達汶泗摩挲泰山礪聖鄉有亡書
求道亦容易童子操觚牘價重麒麟蜀京國天下雄豪
英盡一世舞羽肅文教橐甲飾武備馬跡見騰塵車轍
聞夏鞞翬騫天觀起鱗雜井屋綴千畝開靈潢馴象浴
其汭我皇拓文場羣髦咸戰藝汨予黔婁生言辭罔締
繪但幸晁董死收拾在等第臚傳下閭闔恩澤承滂沛

春雲覆林塘雜花懸火齊詞垣正舒華吹竽獨無喙執
筆御史府羞縮如牡蠣彈評則春秋齟齬失剗刷問俗
西夏國驛過流沙地馬嚙首蒼根人衣駱駝毳雞鳴麥
酒熟木枋薦乾薺浮圖天竺學焚尸取舍利安定昆戎
居貪鄙何足貴返途歷邠岐原田表古畷宛宛陶穴民
艱難謀樹藝驪山葬秦魄茂陵迷漢窀黍離悲故宮脩
竹編清渭日入狐狸驕天陰蟬螗翳溫泉山津陽古瓦
識唐字關河隔山東華岳秋更霽首陽餓夫薇霜露已

憔悴鑄牛挽浮梁恍惚水所噬晉俗棗齒黃冀馬電蛇
駛井陘阨坤維太行逼象緯煌煌日圍近赫赫天人瑞
田舍植汶篁郵亭擷吳桂優游逢化國俯仰詠樂歲豈
用百二險自乃十一稅北都上時巡扈蹕浮雲騎宴鎬
帳殿移拜洛周廬衛巖空山櫻繁川曲紅藥膩列障敕
勒塞萬里靜烽燧九節菖蒲良貢篚充藥餌疇昔閉戶
居耽讀未見試三年不窺園自謂五經笥四十得俸祿
僅可給美饍誰能薄淮陽不作鴻臚寺簡書畏懷歸孤

矢示初志振鷺方擢質冥鴻忽垂翅感歎對囊螢興言
友荷蕢諒非廊廟具頗異市井輩當曳鄒陽裾願擁文
侯篲

贈客

曼巘擢薈蔚繁英粲紛葩銀繭霞已積翠幢栢方遮劇
飲肆豪縱清談宴賓嘉叫嘯虎當巖趨蹌鶴行沙聯蛾
聘趙女貫珠唱吳娃露庭汎蘭叢風閨透窻紗魚泳文
波圓禽翔喬雲斜逸樂諧金石清真况煙霞洗藥秋汲

澗種秣春燒畬寓言託莊列潛心著義媧所貴丘園賁
終然心匪遐

送袁伯長歸浙東二首

龍角不如犀常不生馬廐麟趾不如牛終當在君囿我
行泰山阿日觀望朝候見子被雲服家居夾靈鷲揖之
不得近跂慕塵光後

雞鳴戒僕御具食起就塗僅取資給周豈謂車騎都行
過青齊野忍見人逃逋翁姑累帶索跟脛無完膚即欲

與盤餐但可飽一夫遲遲去國旌能得不疾驅

西方樂

魯郊秋已深西樂多蒲魚日莫積靄重維舟月生初露
涼水禽宿雨晴豔芙蓉擷花結楚佩宛若湘南居

春雲

高雲起城闕流離度庭樹依風拂迴塘波瀾光影注荒
林帶疎煙照日亂縈縷婉變連浮陽空明映淒霧嵐翠
含玉暉景采滿巖嶼逍遙幽賞諧緬邈世娛阻

賦海月送彭君教授九江

江月照人近海月涵太清大地積微塵何能翳其明
朔光儷陽耀陰魄獨含精况爾朝夕馳呼吸成虛盈持茲
燭玄造萬類無遁情彭君忽起揖子以知言名

飲酒五首

進士當盛明自謂非時才狂斐學文字無聖為我裁
二者俱寡合終令智士哈斯旦已陽春對我聊持杯
祖母在堂上小孫方稚孩俯仰見五世居生豈悠哉

簡編有重為折衷無權衡黎庶有重困救藥無持平昔
者賢聖出屯蹇躋其身躋身不躋道龍蛇果能伸棄置
姑飲酒陶然會天真萬物各遂性雜沓向我陳

考妣早棄我得祿不逮親幸茲有祖母九十康強身我
情終不樂日思我親仁襁抱免水火少長俾知倫出入
鄒魯俗用變宿習因植松在淮山稼田為齊民興念輒
涕泣有酒亦逡巡

昔我七世上養馬洮河西六世徙天山日日聞鼓鞀金

室狩河表我祖先羣黎詩書百年澤濡翼豈梁鷓嘗觀
漢建國再世有日碑後來興唐臣肩裔多羌氏春秋聖
人法諸侯亂冠笄夷禮即夷之毫髮各有稽吾生賴陶
化孔階力攀躋敷文佐時運爛爛應璧奎

嗟哉寡諧合蒼髮禿不齊觴至即飲嚼猶恐逢訶詆衆
人以儒進我不限吏資入官養交譽惟恐不合時含笑
作雅詠遭罵亦詭隨出入踐華要誣諉成其私積階漸
崇貴剽獵章句辭鼓頰說古今證據稱云為斯世豈可

誣小夫甘自欺興言發喟歎飲者終不知

留別沂州張君仲

揚舡下彭城分颿上沂水與子作別離眷言重徙倚曩
在京華居連室同井里出則馬轡一作鑣聯入則衣袂比

今也一作茲辰各散去相顧意未已我操田器歸子執州符

仕慎勿輕此身期以善自止

觀耕者有言

庶矣新田殖疲民得無飢先輸公家賦又足食其私老

父揖我語歲功實由茲勸農古有官助給牛種施今官
亦勸農行田吏奔馳爾去告爾長我自安無為

禮部合化堂前後栽小松

買松栽兩階綠髮已可梳恐是女元君截鬚生地腴遲
爾千尺長下產黃琥珀服以安心神飛身作仙客

寄六弟元德宰東鹿

我有六兄弟我長汝最幼我長守田廬汝幼侍親右跋
涉萬里途隨牒越閩岫親復當官清晝坐冥宴豆教汝

讀詩書夙夜獵文囿不幸親棄予萬里汝扶柩汝兄元
禮賢斬服携汝走我自河淮南迎喪匍匐救號哭天不
磨崩裂屢顛踣歸安桐鄉阡銘文手自鏤買石龍舌儀
樹栢夾漢獸俯仰歎存沒今茲霜露又汝今出作縣我
偶尚書遙戒汝憶親教公田代耕耨汝素謹禮法口未
見嗔詬更宜歌我詩無視我老謬憔悴傷民恫恚忿兩
莫關縣政書考功同去聽山溜

端午效六朝體

修篁發秀林新荷曼芳池采絲擷霧縷紗縠含風漪
蕤賓應樂律端陽正歲時馥馥蘭湯浴澹澹蒲酒持漢宮
鬪草戲楚船漲水嬉江心鑄龍鏡好用照湘纍

移梅四首

幽屏逐魚鳥沈跡儔隱淪所欣在林藪嘉植日以親眷
言江介品紛葩號南珍遇我好竒服移根得良因井井
十畝園菁苑蔭澗濱縞裳擢玉質宜此空山春

始逃爨下厄復脫燎原焚結根園畝間炯炯臨水濱疏

華照歲莫綠萼栖寶熏春陽桃杏繁鼎實獨已先遐情
愜真賞來置我石田北枝散餘霞苔先生碧鮮

玄冬陽已復仙葩綴疏星隔浦映碧竹隨風墮寒燈我
來刈薪蒸弛檐南山陘攀莖嗅清馥擷英嚼芳馨膠結
灌木叢顏色無光熒彷徨未忍棄洗濯歸林亭

植爾當庭隅豈復資鼎味遷爾自谷中豈復相嫵媚冽
冽玄冥候衆植各浮脆高標自凌寒孤尚獨冠歲么禽
何處來飛下雙羽翠

初日二首

初日照我樹我樹日華滋檀欒綠陰合四顧無曲枝盛
暑熾煩歎其中有涼颺成林蔭千畝棲息任所宜

初日照我書我書在東牖赫矣先聖言天地相永久秦
火雖燎原其灰為世壽人文待茲成老死學敢後

史館閒題二首

騎馬到畫省冠佩趨几筵豈但文字美所樂長官賢京
國足府寺金穀相百千飛書日雜還奔命想不先肅肅

館閣嚴操觚績簡編上有日月光下有草木妍森羅大
象列俟此言語宣蹇予昧儒學羣髦辱官聯遭逢賴明
世益喜身悠然

畫省真仙居華屋映丹樹青石倚闌干松髮沐雲霧綺
疏刻連錢承塵畫翔鷺中有河漢文夜深室光聚玉函
黃金鑰太史自侍御河上一豎儒伊吾誦章句偶趨彤
庭詔詞林邇天路雖樂文雅懿終慙紬繹誤

擬古

長安青雲士任俠日娛遊千金為人壽萬金買名謳小
舅拜郎官女壻恩澤侯出入意氣盛歡樂不知憂銀枰
薦海品羊酪乞蒼頭生逢承平世死葬崑崙丘

登都北神山醉中題壁

過溪踏瑤瓊入山采蒼翠仙宮名神山下負六鼇背我
來訪丹藥羽人已千歲清嘯響山谷幽姿媚松檜白水
從北來南與衆川會開窻目沃野千峰儼相對自是山
林樂何但官爵貴買田釀清泉里社日相慰詩成悵如

失天風逼衣袂東望鄒衍廟杯酒可遠酌談天劇當時
古屋尚粉繪騎驢獨歸去人世空一喟

種桃

種桃南山麓三歲不得實種瓜東郊園擷之在百日豈
不思遲莫終焉有常食如何種一作植 瑤草千歲始一獲

擬古

驅車上疾坡六馬汗滿溝解航下急瀧百夫不能留微
機有逆順無用卜筮謀車遲或可安航速或覆流

度居庸關次繼學韻

飛鞚陟雲巘，決皆畫圖畫。天氣吹高寒，山雨灑長夏。冥冥白鳥去，寂寂松子下。陸行石當途，水春泉繞舍。高與蜀道齊，深乃盤谷亞。筍輿約重來，羸馬苦常跨。朋從詠連疊，酬應給閒暇。得見王子喬，吾將驂鶴駕。

題惠崇畫

龍門千尺梧桐樹，多在石崖懸絕處。上有古巢生鳳凰，鳳凰臺高山水長。吳蠶八繭白雲絲，畫史落筆光陸離。

江天萬里莫射鴈春草年年出湖岸

淮安路池山

淮浦蒲花秋渺渺淮岸楊花春裊裊白魚初下酒船來
十里風煙隔飛鳥吾生欲向淮安居更聞池山好田廬
濯足滄浪箕踞坐不問朝家求聘車

贈陳衆仲秀才纈雲辭

纈雲織波射金水郎君水西著皮屨南陌紫塵十丈高
捋鬚買酒意氣豪萬里將書憑好鳥荔枝千顆團團小

天津不隔少微星
閭闔門開夜光曉

湖北驛中偶成

江田稻花露始零
浦中蓮子青
復青楚船祠龍來買酒
十幅蒲帆上洞庭
羅衣熏香錢滿篋
身是揚州販鹽客
明年載米入長安
妻封縣君身有官

李後主圖

澤國中寒歲年宴
沙嶼潮痕明
石棧風吹半樹野
梅發
天上書來問春鴈
江南後主丹鉛手
畫盡冰絲世無有

宮中長晝諫囊稀媚嫵吳娃雙進酒

寄鄉友

河邊老父念我出遠寄京華書一行謂言白髮今多少
又報南園竹樹荒門前石田耕秣熟犢子新生走如鹿
莫戀官家有俸錢長年作客身如束

題明皇端箭圖

寧王玉笛吹鳳凰桐花秋露宮書長開元天子忽思武
手中金箭照眼光何物羣婢出後房羽林孤兒射殺將

坐中凜凜無漁陽

上京書懷

燕子泥融蘭葉短
疊疊荷錢水初滿
人家時節近端陽
繡袂羅衫雙佩光
共笑江南五雜組
畫鷁浮波供角黍
沙苑射柳追風駒
古來北地為名區

室婦歎

南陌日長春已半天
風猶寒室婦歎咄哉
室婦爾何為
卉衣廩粟充凍饑飽
煖無憂樂以嬉
乃此屢歎將有私

室婦涕泗言復咽食鮮袂良焉足說近聞官家賑貧民
雄保諸州已捐瘠翁姑帶索行累累弱兒失爺夫失妻
哀號邨空野樹槁蔀屋見斗餓鼠嗥縣令具名報大府
星火符來應期聚索錢買餅飼公卒書券質田問鄰主
艱難憔悴不易狀誰實為之俾無養嗚呼吾人痛切膚
忍死莫作盜賊徒君不見蒼鷹乳虎有司靡何但歲凶
人化鬼

息齋風竹圖道士華山隱得之命予賦之

往年家住篔簹谷丹鸞之實美如粟玄雲翻空下深靚
昆吾寶刀削秋玉石衣漬錦侵書光風微粉墮生細香
琳館瑤臺九天近夜寒笙磬聲鏘鏘萬斛蒼煙鬱江雨
二妃彈瑟瀟湘浦鄖筒蜀酒亦堪沽蟠石雙杖令誰取
河朔歲晏冰為梁羣木鱗皴臨雪霜遲汝狂飈莫吹裂
截管他年侑帝觴

上京效李長吉

龍沙秋淺雲光薄畫羅宮衣侵曉著吳娃楚娘侍團扇

象輿鳳輦明珠絡椒花染紫風雨香三十六盤天路長
南都北都望行幸千秋萬歲迎君王

李夫人

未央天子香熏骨夫人不貯黃金屋水銅無光澀秋月
留得當年舊蛾綠瑤臺夜佩聲闌珊沈雲叫鴈沙泉寒
二十五絃彈鳳凰玉釵小燕飛春山

蔡州妓趙氏墜崖以死自誓作詩諷俗

鱗鱗汝水冰碧光汝之左右百草芳紅蘭紫桂娟長晝

鉤輶鳥子回銀塘
芡蒲無數菱葉小
西家鞦韆屬年少
燕泥霽雨風景酣
簾箔依稀有歌笑
趙氏女子邯鄲娼
綵絲繡履踏春陽
心思宛轉縈雲縷
羞對兒郎唱鳳凰
樂山嵯峩石生雨
鄉人迎神奏歌舞
婆婆起向神祠前
祝願生身事針組
野風吹目雙淚零
泉聲松韻相泠泠
誰言女子情愛癖
誓死命輕如鳥翎
鳥翎飛上合歡樹
開花夜夜無愁苦
秋香不斷相思浦
玉釵斷股埋黃土

秋意

銀牀墜露下高桐竹練含冰留麝射籠蒲萄酒作碼碯紅
湘娥江邊采芙蓉月華流影天漢東素商淒清颺微風
草根知秋有鳴蛩

寄家書

春雲閣雨花泥少池上波平飛白鳥蘄中河外盡天涯
蓮葉圓時身到家

送文著作往鄂州諭南使

大化均天施黃圖象岳寧宣風依日月發號布雷霆貌

虎巖分鎮鷓鴣蔚在廷芝莖聯孔廟莫葉茂堯庭珠米
圓圓白樓桑箇箇青謳吟興隴畝游行及郊垌楚俗那
三戶滇童信六經已知含煦育復此仰儀刑使得皇華
美歌應湛露聽賜衣裁錦段官醞應瑤餅上國崇懷服
熙朝尚德馨魚書閒粉蠹雞卜枉軺星鄂渚翔鸚鵡燕
臺念鵲鴿歸途回四牡楓樹失江汀

送王眉叟真人

秋暉上寒竹白鶴立蒼苔石洞松花落雲房澗水來彈

琴翻道曲擣藥應猿哀別浦迴船急孤山看早梅

伯長內翰與繼學內翰聯句賦畫松詩清壯偉
麗備體諸家祖常實不能及後塵也仍作詩美
之焉

吳絹冰絲白秦封石髮青沐華浮鶴露戢景蔽鷄星刻
畫風雲狀雕鏡鳥獸形哦詩鏗玉署集句燦珠經熒熒
舒光氣沈沈逐杳冥離歌三疊唱凱奏萬鏡聽肅穆官
師位雍容樂舞庭江花春豔豔山竹雪亭亭自笑如塵

俗懷慚似酒醒無因題琥珀有去對鷓鴣

春寒

春寒犢子瘦誰與念農耕地底多生暖天邊正要晴落
梅栖雪暈裂竹見風聲為問催花鳥如何得使名

謁告書懷

先子桐鄉地年來憶舊遊山春花競發沙晚水閒流石
屋青霞夜藤牀碧樹秋防身龍具在強欲問吳鉤

送董仁甫之西臺幕

西南萬里地詔屬大行臺秦樹浮天去巴江帶雪來山
河無用險邦國正須才臺幕風流美書籤想盡

一作
畫開

靈州

乍入西河地歸心見夢餘蒲萄憐酒美苜蓿趁田居少
婦能騎馬高年未識書清明重農穀稍稍把犁鉏

宿遷縣

河伯朝宗日黃昏

一作
塵

出岸高蛟龍分窟穴舟楫用波

濤使者修隄急田疇棄屋逃無錢誰貫汝歲晚更嗷嗷

呂梁

天府河流北徐方禹跡難青山開石峽白日看風湍星
宿光芒合坤維脉絡蟠吳船牽百丈醜酒酌陰官

海子橋

朝馬秋塵急天潢晚鏡舒影圓雲度鳥波靜藻依魚石
棧通星漢銀河落水渠無人洗寒露為我媚芙蓉

秋谷平章生日

上宰儒宗重中台位望隆承天施塊北捧日照瞳矐汾

洛精靈合文章運會通鄧侯初亦

一作生兆

昂周翰降維嵩

姬正逢陽復羲車舍斗中眉毫齊紺髮仙骨炯方瞳鸞
鳳翔千仞貂蟬侍兩宮天池浮畫鷁公袞煥華蟲造命
毗元化書思沃帝聰山河尊社稷禮樂賴臣工韓國蕃
宣永高皇報施崇從來黃閣貴只屬紫芝翁檻竹沈沈
翠庭花灼灼紅道山藏畫象詞館轉詩筒洛下耆英盛
人間壽域同君王自養老何羨菊潭東

泉南孫氏園亭

鑿石通歸汐浮梁看浴暎鴨闌萍上翫鹿柵蘚生垣蒼
荀垂梔子笄篔簹長竹孫書香芸辟蠹席暖錦裁鶴交客
登仙籍承家荷帝恩冰甌蜂蜜溜酒榼荔漿翻吹簫花
圍屋彈琴鶴舞園海雲春有態閩雪夜無痕誰謂衣裳
嬾予今杖屨煩捋鬚歌月地翹首望天門

次韻繼學三首

金爵層霄外銀猊曲檻邊含香俱國士持橐半神仙豈
有遮塵手應無見麴涎池清天似水席暖罽如綿客送

蒲萄酒人分首宿田書思趨豹省揆藻賦龍船

時上京自大都

移舟至

誰念馮唐老為郎白首年

雞塞西寧外龍沙北極邊有天皆入貢無地不生仙鵲
玉光含水驪珠濕帶涎香清堪閉閣衣薄豈勝綿珥筆
遊鰲禁扶犁占鶴田酒來揚子宅人上剡溪船自信篇
章貴能歌擊壤年

丞相晨趨漏元戎夜拓邊碧雞宗漢時丹藥鑿秦仙敢
謂鰲頭遜初逃虎口涎柳詞方濯錦雪賦已抽綿豔豔

金為屋輝輝玉滿田客衣隨楚製鄉夢逐吳船所賴三
階正螭均記有年

陪可用中議祠星於天寶宮

教命司諸席元辰集醮筵星君符介壽歲紀輯安躔炬
焰天無夜熏焚樹有煙音如緱嶺上拜似竹宮前蕊笈
祥延世飈輪儼御仙日餘青煒接宿耀罽壇連象緯昭
重潤齋明祝大年步虛垂珮響奠幣織文鮮誠感將馨
祀神娛樂鼓淵蕃釐歸帝胄孚佑播農田

崇真宮西梨花

春日梨花下相逢把臂行香痕憐粉白酒暈惜紅輕影
動簾穿燕聲來樹度鶯共當拚一醉莫待鬢華生

明日在羅中官園池次韻

帝里春光媚花前可獨行額黃團帶小眉綠畫痕輕蕩
漿波浮鷓裁衣粉妒鶯却愁風信惡明日樹陰生

盧師山下過郝景文參政墓

故相聲名遠荒阡松栢長地能終不夜天莫借飛光舊

客驅車過新詩灑淚傷千年此山下樵牧禁牛羊

送史正翁經歷之嘉興

京華春滿眼楚客榜船歸花送行衣舞鸞從上苑飛萼
鱸隨俸入桑苧接田肥鈴閣文書少還知小吏稀

姚左司墨竹爲賈仲章尚書賦十韻

江渚春生雨山楹夜宿雲籜鱗穿石錦節粉帶書芸玄
玉昆刀削素絲并翦分魚竿方問野鳳管已招君莫作
宣房楫還歌華澤文露零忻鶴警星度恐螢焚影似風

櫺見聲如雪幌聞裁冠終有製作屋更無氛移植驚燕
叟盤根識楚妘中郎揮墨汁宗伯侑鑪熏

送宋誠夫太監祠海上諸神

上聖崇明祀元臣屬有文內香開寶炷制幣出玄纁授
節臨前殿傳臚聽後軍酒清黃木廟魚祭武夷君颺母
應回雨天妃却下雲不勞風有隧猶願楚無氛漕粟瑯
琊見還珠合浦聞穹蒼天塊潏溟渤氣絪縕龍戶編魚
賦鮫人織霧紋時祠光炯炯宣室語欣欣鵬運連番舶

輶歸願翼羣觀書曾拜洛歌賦不橫汾越水琉璃靜
花茉莉熏伏波封莫請宵旰念華勛

求趙伯顯畫家山圖用唐李中韻

春鴈南來後家書一紙無山花應向日陂水計通湖
羸特衣資絮生蠶薄藉蘆久宜拂白石強此伏青蒲
琴客分抄譜仙翁許借壺園紅榴火鍊治綠芡盤鋪
嵐氣飄簷隙烟光鬱座隅呼雲橫蟬竦問月看蟾蜍
倚杖心何逸觀魚興不辜新開竹林逕并乞寫成圖

猗綠園

殖產吾何取開林我獨能
縛船嘗取竹擣紙每移藤
池曲波濤小花繅霧雨蒸
春雲同礎潤秋月共江澄
鳳下非因食魚來不可曾
寫經還道士裹飯乞行僧
筍屨新青折荷衣舊翠凝
浮甌茶有乳溢甕酒無冰
香爇留文篆書囊剩繚綾
清晨餐玉罷東坐日初升

出都

長城懷古處身在日華東
水出盧龍塞山連碣石宮
沙

鷗終自白霜樹忽然紅
雲海鴻濛氣歸颿香靄中

登雨花臺

積翠生層巘凝光浴巨濤
吳城花覆井楚舸竹栽篙
地近魚龍逼天空鶴鶴高
野橋皆蟬蛸溪水盡蒲萄
雨石逢芝箭風林得鳳毛
臙脂兒女小罨畫鬼神饕
六代都銜壁三山尚戴鰲
故宮猶在苒古樹漫周遭
仙洞歌瑤草人家宴碧桃
飯香非接浙酒好不芻糟
綠霧春連閣丹霞曉映袍
攀躋忻境勝跋涉憚人勞
老我才還劣清

資愧重叨採詩今有使問俗似無曹佳麗千年最聲名
一世豪歲時休澣日攜手可遊遨

贈楊洞天道人

我自不入俗君今又欲仙鳥嘯百花裏屋住萬山邊密
樹雲難過空潭月易圓題詩秋卷了為說小行年

五言六首

太行東北去形勢自天分一葦航吳越千車輓朔雲衣
冠今復盛豪傑古猶聞欲獻三都賦茫然媿不文

不作還山夢因吟李杜詩平生無飽飯抵死只憂時事
實兼唐史風流揖楚詞山川舊遊處千載有餘悲

好去春山路騎驢罨畫中徜徉紫芝客憔悴鹿皮翁得
酒寧辭醉逢人莫語窮乾坤皆古意人自不相同

御史青驄馬詞臣白玉堂有才皆展驥此老尚亡羊雲
海迷舟路天風失鴈行不須愁白髮正欲媚幽光

聞道光山縣城南十里賒人家依翠竹野水亂梅花應
有仙燒藥寧寧無客艤槎行當問田畝結屋貯煙霞

栽竹復栽花居然處士家有田供白飯無句咏青霞春
雨浮鄰甕秋船繫樹槎漁樵相見熟來聽讀南華

北行

山轉疑無路溪深似有雲衣裳沾沆漑鞍馬入氤氲巖
樹花凝畫崖藤蔓駐曛佛宮金市市帳屋錦文文塵盆
車爭出霞舒騎亂分煙中聽犬吠天畔見人耘草檄期
誅泚歌詩擬弔蒼家家收粟粟處處種榆枌枕有仙人
記琴無山鬼聞時巡勞聖主靈會名神君泉脉流釵股

松身鏤纈紋團團留象迹
蠹蠹立馳羣龍虎盤南石貌
貅鎮北軍井鹽仍晶晶馬酒亦醺醺
越貢珠璣錯夷琛
翠羽紛弓旌徵隱逸斧鉞賜功勳
俗已多羊酪民還賤
豕豮雨餘雷菌長秋入地椒芬井邑
睽山海倉箱溢隴
汾白鷹隨雪鴈黃鼠掘田鼯太祖初飛御中原正溺焚
劍光明塞道箭影落冥氛聖嗣開元極天聲震大鼓
賁轅門方納禹國鏡又收員降主來銜璧奔君自束縕只今
修枸簾何但去輓轅公子衣縫掖王妃曳練袞期縣堯

歷祚物阜舜風薰學士工謨訓成均載典墳小臣難頌
德祇合採書芸

送同年趙繼清尹安陸

席帽文場裏于今十七年白鬚俱滿鏡墨綬獨行田
鵝翼知吾刺鸞棲覺汝賢高才多晚達未可歎迍邰

寄舒真人

金闕來華蓋琳壇集羽衣石因鍾乳膩松為茯苓肥劑
墨香翻杵修琴玉布徽天低臨象緯日近逼光輝竹裏

開長逕池邊蔽小扉紅迷霞綺錯綠漲水環圍仙杏葩
凝赤蟠桃萼翦緋龍來還獨宿鶴去更知歸割蜜蜂先
避銜書鳳自飛祠雷陳古磬符鬼掣靈旂丹井泉偏冽
銅盤露未晞俗人那得識詩客盡相依伊我逢休澣從
茲詠浴沂憑師消鄙吝猶可採山薇

送華山隱之宗陽宮

江閣魚龍近山房霧雨多地清天不暑池曲水無波筍
籜迎書帶櫻桃送錦窠呦呦呼伴鹿啜啜換經鵝養素

行編屨乘閒坐織蓑幾篇餐玉法一帙醮星科香炷沈
銀葉衣裾佩紫荷丹光留海月絳景出松蘿醉憶泉浮
乳幽憐石爛柯神君攀綠桂天女踏青莎邀客登山頂
尋真入澗阿洞簫吹道曲雲紙寫魚歌予髮今如此君
心可奈何高談見明月爲我問娑羅

石田山居八首

甲子人愁雨河田麥已丹歲凶捐瘠衆天遠禱祠難賈
客還沽酒王孫自飽餐更憐鰲面黑征戍出桑乾

積雨衣裳濕愁人是麥田泥將深沒馬霧欲墮飛鳶爨
火勞薪畫家居老屋穿牆根雜蛙蚓擬買繫籬船

光山楓製錦潢浦荻飛絛秫熟何論酒魚來不計錢卜
鄰多野老求藥有神仙爲客留羹筍清晨步石田

四月淮天雨清林蔭碧池筍香鄰甕酒禽響

一作聽

客窻

棋田鼓春迎社鄉巫夜賽祠漸知飄泊久自覺是農師
無麥夫何極吾憂隴畝空豈能驅盜賊得忍鬻兒童茶
蓼充腸熟樵蘇救口窮無端縣小吏名役到疲癯

作客何多意淮南即是家自牽蘿屋小不正葛巾斜書
嬾眠尤熟詩來酒更賒春天雲嫵媚相對坐鷗沙

竟日無賓主山房一禿翁竹光浮晝碧花蕊颺春紅田

父分雞桀

一作
柵

鄰僧乞

一作
與

鶴籠時行親杖屨未覺坐

書空

淮南窮僻地先世有林廬花曙鳴山鳥芹春躍岸魚鼓
琴仙度曲種杏客傳書朋舊如相覓休嗔禮法疎

用樂天韻因效其題詠閒意

縑絲車響雨來稀
罨畫圖中住翠微
邨北邨南桑扈叫
家前家後竹雞飛
青憐藤蔓春牽屋
綠愛荷盤夏翦衣
更憶江天家萬里
行逢僧子借船歸

壽郝大參

退傅歸來髮尚青
角巾閒對老人星
鳳凰池上辭松閣
鸚鵡洲邊買竹亭
留客只談三里霧
見人不問五侯鯖
慚無剛卯為公壽
他日淮南種茯苓

寄隱士

林下蕭然一病身，可憐家計若爲親。
葛花藤蔓供山貢，菰米蓮房給水珍。
鶴子見貧能代僕，犬兒知主會憎人。
清朝日日弓旌出，誰說巢由不冑臣。

奉和鄂通都事秋懷

靈河七夕巧雲稠，墜露聲清夜得秋。
月冷桂花飄左界，

山寒

一作空
又作深

荔子落東甌，人憐紈綺裁。
衣袂誰借蒲葵，

翦扇頭竹影近，窻砧杵急夢隨。
南客問行舟，

雙頭菊

金屈卮邊醉袖垂秋雲如幄貯仙姿寒生小靨迴鸞動
香入流蘇睡鴨移結綬巧承西顥曲落鈿羞帶月支眉
青霜爲我催憔悴銀屋何人怨別離

送呼都克忒爾著作祠岳瀆

戊午
狀元

日長東觀著書清絳薦龍香爲帝擎山闕發靈銀甕出

河宮迎節馬圖明行觀謠俗期星使歸奏蕃釐拜月卿
千里楚鄉乘傳去關人應識棄繻生

和繼學郎中送友歸越中

薊門東望海無波誰許山人問薜蘿雀舫春聲留水鷺
鵠袍秋影動天鵝鑑湖草滿芙蓉少鄞縣一作水潮來牡
蠣多羞見京塵遮帽頂羊裘亦欲換漁蓑

輓何得之先生

手織烏紗日賣錢全家閤

一作移

住五雲邊伏生有女書

空在伯道無兒世共憐北市行歌花爛熳西亭坐嘯月
嬋娟少微光氣一作星彩今年閤知是詩隨過海船

錢塘潮

石橋西畔竹棚斜，閒日浮舟閱歲華。
金鑿懸崖開佛國，玉分飛瀑過人家。
風杉鶴下春鳴埵，雨樹猿啼暝蹋花。
欲賃茭田來此住，東南更望赤城霞。

追和許渾遊溪夜回韻

溪水連雲過竹閒，溪聲雲影半潺潺。
鶴來近屋童看熟，鷺下長松客對閒。
直待月痕侵石隴，還期煙色認柴關。
人生豈獨官爲貴，好向君王乞越山。

賦王叔能宅芍藥

鴛粉分奩豔有光
天工巧製殿春陽
霞繒襞積雲千疊
寶盃凝脂蜜半香
竝蒂當階盤綬帶
金苞向日剖珠囊
詩人莫詠揚州紫
便與花王可頡頏

上京翰苑書懷三首

沙草山低叫白翎
松林春雨樹青青
土房通火爲長炕
羶屋疎涼啓小櫺
六月椒香駝貢乳
九秋雷隱菌收釘
誰知重見鰲峰客
颯颯臨風鬢已星

門外春橋漾綠波
因尋紅藥過南坡
已知積水皆爲海

不信疏星又隔河酒市杯陳金錯落人家冠簇翠盤陀
薰風到面無蒸暑去鳥長雲柰客何

萬里雲沙碣石西高樓一望夕陽低谷量

一作深

牛馬煙

霞錯天險山河海岱齊貢篚銀貂金作藉官窰磁盞玉
爲泥未央殿下長生樹還許尋巢彩鳳棲

次韻王參議寄上京胡安常諸公二首

石甃冰澌古不消廣寒張樂喜聞韶五防戲馬春旗合
百隊回龍曉仗朝闔闔門高承藻井番禺縣遠貢鮫綃

年年載筆陪京道題柱相如又過橋

省中溫樹晝陰陰郎署熏衣晝麝沈星近紫垣明上界
日行黃道對天心和鸞秋駕車塵靜佩玉朝鳴漏水深
好乞龍門灘上石種桐千尺斷爲琴

貢院憶繼學治書

棘闈粉署隔重牆校藝分官屬正郎五夜風簾燒蠟燭
九天冰樹劑龍香周旋接武尚書履供帳留茵御史牀
臚唱閣門春色曙侍臣應奏慶雲章

治書寵和誤用光字仍再次韻

金吾魚鑰限南牆
襪被淹旬借直郎
燈轉九枝回晝景
筆題雙榜奪春光
番禺珠琲寧無樹
勾漏丹砂信有牀
明日大廷親策試
昭回雲漢見天章

治書再和復次韻

西南春巷杏花牆
索米長安漢戟郎
市裏忽聞雞吐綬
海邊還報鳥含香
月移桂樹通階石
芝發銅池謝井牀
瀑直閣門休沐夕
新詩刻燭賦千章

貢仲章待制寵和次韻

宮雲光影度椒牆待制官高不是郎夕拜日升龍尾道
朝回天賜馬人一作牙香戴憑久負談經席阮籍唯知近
酒牀春巷杏花開未遍門前欣得碧霞章

畫古木

桑空河上生賢相楓老山中化羽人未借九關當地軸
還曾八月上天津雷燒桐尾琴材古玉刻龍形劍具新
雨蝕蒼皮苔護石泉春玉乳月翻輪東隄楊柳春煙暖

西浦芙蓉曉露勻，偃蹇孤根巖壑氣。我知棧樸不爲薪，
鄆陵別南客。

稜層林表白浮圖，古鄆城高旅望孤。秋雨喜沾梁土麥，
暝煙愁合楚田蕪。行人北上隨沙鴈，歸客南還對渚鳧。
溱洧波清多草樹，百年生聚尚繩樞。

寄弘長老雲山

曙雨初生蟬竦橋，梵山吟唄不移朝。曾分禪榻春盤磻，
更想雲山夜寂寥。繭紙題詩尋伴少，鄆筒沽酒入城遙。

佛龕千丈金銀界照世酥燈弟子燒

龍虎臺應制

龍虎臺高秋意多翠華來日似鸞坡天將山海為城塹
人倚雲霞作綺羅周穆故慚黃竹賦漢高空奏大風歌
兩京巡省非行幸要使蒼生樂至和

徽政院公退

早春天氣半晴陰坐隔宮牆望上林御水有波皆浴鳳
官橋無柳不拖金相風竿直青雲近井幹樓高綠霧深

朝路莫歸塵更合五方調馬出駸駸

奉陪薦食英宗神御殿用繼學韻

垂石松陰偃翠虬先皇曾此駐龍輶茂陵弓劍隨天御
原廟衣冠奉月遊藉玉已行周制度耐金不罰漢諸侯
百馨水陸修殖醞望拜孤臣涕莫收

送王參政上京奏選二首

滇池細馬踏龍沙宰

一作參

相朝天路不賒峽裏琴泉春

作乳月中珠樹夜成花三千禮樂尊儒術百二山河壯

帝家魚上禹門無點額直郎宣奏日當衙

千官吉日聽宣麻白髮文

一作詞

臣帝汝嘉池鳳有毛皆

五色蕊珠無樹不三花綠綈詔底書分雨紅錦囊中字
翦霞天路北盤三十六歸時秋月滿京華

贈內

幾年不到鹿門山妻子相看亦強顏桂樹有枝曾獨折
女蘿無蔓不同攀仙人樓上騎黃鶴野客籠中放白鷗
莫恨五湖波浪濶鬢毛歸去未全斑

畫海棠圖

石家五尺珊瑚樹海國千房火齊珠風雨春寒圍錦護
豔陽天暖倚闌扶浣時應貯芙蓉水香處重熏翡翠鑪
紅膩不隨蜂紫蝓蝕粉勻終為蝶身數歲蕤綵纈盤仙綬
襞積雲羅落舞襦青帝化成非幻有杜陵吟老却知無
催開每賴斟酌鸚鵡吹落還因唱鷓鴣曾見赤城花亞蕊
丹鉛此去不須圖

送毛真人還山

朱提仙印碧霞裳賜履承恩自尚方
雨灑石壇苔錦滑日穿油幌竹書光
葉覓此日還滄海漢鵠當年下建章
琪樹萬叢芝萬本江南歸路水雲鄉

奏對興聖殿後

萬花簇錦寶簾垂化日舒舒漏下遲
馬酒金盤流沆瀣凌人玉井出琉璃
侍臣橐筆皆鷓鳳御士橐弓盡虎羆
他日滄洲應夢想紫宸端御放朝時

雜詠二首

百丈牽船沂上流
清淮從古有三洲
浮山堰逐降王去
淝水波因小謝收
紅樹有霜還可騎
白蘋無雨更宜舟
平生自是多行役
莫信吾家馬少游

濠梁無客更觀魚
遊子行過莫問書
潮落沙痕鷗泛少
風回雲影鴈行疎
歸帆夜宿山前寺
從橐秋辭仗外車
俯仰此身天地內
滄洲重去帶經鉏

西山

鳳城西去玉泉頭
楊柳隄長馬上遊
六月薰風吹別殿

半天飛雨灑重樓山浮樹蓋連雲動露滴何盤並水流
艤岸龍舟能北望翠華來日正清秋

試院雜題五首

小雨霏微不作泥棘闈魚鑰待晨雞銀袍影近花燈立
綵戶光連粉署題霖霖已霑文運慶綢緼猶覺化鈞齊
端門三月黃金榜應有商霖應上奎

蓮炬銀臺墮蠟泥穉瑜重席織文雞計偕萬里人交趾
骨買千金馬月題省樹春回珠蕊亞御溝冰泮纈波齊

臚傳名上多龍虎昨夕官占已報奎

春闈新雨透花泥學士聯詩擬鬪雞
驥裏龍媒來大宛
狡狴獅子出雕題宮花壓帽牌金小
官錦裁袍綬綵齊
奏牘三千方朔健天章爛熳象西奎

歌詩且莫到青泥好倩王褒頌碧雞
人去淮南愁米價
鴈來江北問書題催花曉樹飄簾密
滋麥春膏覆壟齊
最喜泰階平在位衆星分次繞明奎

遊客春來醉若泥攝官一月伏雌雞
連茵夜聽同年語

寫紙朝分舉子題畫閣薰香金篆鬱銀臺燒燭玉蟲齊
太官已具恩榮宴列宿重輝想次奎

光山縣尹孔凝道作縣有聲鄉人為圖

一作題
光山縣

孔宰齋
風亭

光山近在故山西樹滿江頭稻滿畦鄰屋讀書相教授
社祠醉酒共提携水牛礪角嫌耕淺野繭抽絲喜價低
春雨行田無從吏獨騎齋馬畏青泥

無題四首

瓦溝銀竹曙翻江
閬苑涼風滿石幢
葛令寄來丹白一
陶公歸去酒瓢雙
梧桐寂莫陳公井
薜荔扶疎玉女窻
天畔帝車呼小鳳
桂花流水夜淙淙

鶴城十二疊瑤光
琪樹懸秋四面香
蛺蝶染花生粉白
玻璃著酒暖金黃
熏鑪舊夢憑荀令
燭釵閒吟屬沈郎
南國鴈來書不至
江樓誰為製荷裳

三湘瀟灑恨無潮
烏鵲填河願有橋
丹穴鳳來龍樹遠
海門魚去蜃樓遙
已知京兆誇高髻
不信章華鬪細腰

船尾橫江春水急
長年無事醉吹簫

愛酒書生白髮垂
鸞膠獼髓豈能醫
漢宮鬪草端陽節
唐殿穿針七夕時
竹上蠓房真可買
石間芝箭似難移
揚雄擬奏河東賦
但乞君王酒一卮

次前韻四首

岷峩山下錦成江
好買玄都翡翠幢
竹種篔簹千萬个
鳥飛灘漲兩三雙
銅龍漏下春生水
金馬神來霧入窗
窻花落天台招小隱
胡麻飯熟石淙淙

斂

一作

切玉龍刀寶氣光
袷羅半臂麝臍香
荔枝囊蜜媽媽紫

盧橘團金顆顆黃
秦氏故侯更漢主
石家小婦嫁孫郎

江心誰鑄芙蓉鏡
照見嫦娥一作姮
織翠裳

錢塘八月水生潮
邛笮千年竹架一作作
橋簾織龍鬚天

路近衣裁蟬翼渚
宮遙府中丞相魚
垂帶閩外將軍箭

插腰無奈黃金閤
買賦雲間學得鳳
凰簫

樂部韋娘舞小垂
病來能名一作識
翰林醫唄人書奏三

千牘勸客歌詩十二時
金谷花枝隨雨盡
石城江水逐

潮移世間若有神仙術西去瑤池醉酒卮

龍門

萬壑奔流一峽開君王歲歲御龍來人間塵土常相隔
天上星辰到此迴草木四時承午日風雲半夜東春雷
自慚曾奏長門賦跋馬傍徨念暴鯤

還過龍門

紫塞秋高鳳輦迴龍門有客去還來盪摩日月崑崙坼
吐納風雲混沌開天帝有神司主宰地霧無力戴崔嵬

誰吹石瀨成飛雨不使時人污酒杯

駕發上京

蒼龍對闕夾天閭秋駕凌晨出國門十里貔貅騎驪裊
一雙日月繡旗旛講蒐獵較黃羊圈賜宴恩沾白獸尊
赫奕漢家人物盛馬卿有賦在文園

和袁伯長待制送虞伯生博士祠祭嶽鎮江河
后土

房闈歌兒翠黛摧不禁夫壻陟崔嵬一春花好人相別

四月梅黃雨又來酒酌玉缸酣臉暈香消銀葉蠹鑪灰
祠官好致君王意蚤奉神休馬首回

此題清容集本是
兩韻石田集亦載

二首而前一首低字韻見陸天錫集各本皆然及元音
體要諸選亦俱作陸詩豈伯庸天錫各存一詩耶抑其
中必有一誤也姑
仍其舊以俟考

琉璃簾

吳儂巧製玉玲瓏翡翠蝦鬚迴不同萬縷橫陳銀色界
一塵不入水晶宮月華遠射離離白燈影斜穿細細紅
相隔神仙纔咫尺靈犀一點若爲通

菊枕

東籬采采數枝霜，包裹西風入夢涼。
半夜歸心三逕遠，一囊秋色四屏香。
牀頭未覺黃金盡，鏡底難教白髮長。
幾度醉來消不得，卧收清氣入詩腸。

野興

滄洲梅發月生波，屋角寒藤半挂蘿。
孤石隱林真似馬，亂雲渡水却如鵝。
步隨野老逢人少，閒過鄰家有酒多。
轉憶淮南粳稻熟，夜歸衝雨借田蓑。

開平事

金馬門東畫省西，千官花覆曙光低。
九莖芝蓋雲衣合，百石銅盤露顆齊。
鹿柵已營修竹隴，燕巢還補落花泥。
上林伏日金桃熟，鸚鵡來時不敢棲。

次韻進士宋顯夫海岸春行

靈沼春波殿影高，行人苑外望蟠桃。
街塵曙雨沈紅霧，宮瓦晴霏動翠濤。
鳥度鏡中還避彈，魚跳船尾不因篙。
曲江別有新承宴，笑我官曹似馬曹。

駕發

紫繡鸞旗不受風
北都駕發日曛曛
九秋宮殿明天外
十部簫韶起仗中
白海水波浮曉綠
赤城花蕊帶春紅
神皋不用清塵雨
輦路龍沙藉草重

送宋顯夫南歸

琵琶溝北識君初
藉甚才華二十餘
欲賦兔園干孝邸
不同狗監薦相如
瀟湘路熟逢知己
韋杜天低望故居
携笏歸來拜丘隴
南遊莫戀武昌魚

寄淡淵提點

仙客吹簫踏月輪因遊淮海誤尋真松花擣藥分貧士
柿葉題詩寄遠人秋浦有潮留載酒春雲不雨取裁巾
江都千樹隋宮柳曾見先生綠髮新

送客西歸

陸機初入洛王粲却歸秦春草無愁思楊花送遠人

雪中登郡城西亭二首

石路屐齒滑天風吹高寒花明喜珠綴竹瘦愁露溥

楚甸無層冰霰霰土膏濕更憐三角湖澄徹瑩寒碧

弔節婦

白日松臺闕青山石椁沈空餘哭夫淚下入九泉深

題四皓圖

不聽高皇召還來太子宮阿彌人彘禍吾恨紫芝翁

僧院蜀葵

紫暈成丹景黃塲綴綠幢何因女冠子却近老僧窻

閒題樹葉上

秋意鳳城多涼飈柰夜何題詩滿霜葉不見洞庭波

山水圖

石壁雲生樹濤江雨閣船居人屬仙籍長負免丁錢

李陵臺二首

故國關河遠高臺日月荒頗聞蘇屬國海上牧羝羊
蹄林聞野祭漢室議門誅辛苦樓蘭將淒涼太史書

畫鷹

側視窺霄漢低飛近草萊金鞵時一脫肉飽更須回

題猿圖

江渚無來鴈山樊有宿猿
秋高盧橘熟巴月樹連邨

黃河

塵海東南下雲山西北高
黃流蕩中涵萬里費波濤

獨石

秋瀨喧石梁臨流不甯渡
與客坐忘歸山寒日將莫

六言三首

南塘雨晴草滿西林
春早花疎道士燒丹
借竈山翁種

樹求書

白鳥飛來何許青山閒對誰家日莫一尊濁酒不知風
帽欹斜

絕澗花迎莫竹回塘水媚春雲欲賦淮南招隱山中桂
樹留人

楊妃墓

漢廟衣冠照碧燐唐陵翁仲作黃塵馬嵬坡上棠梨樹
猶占秦原幾日春

南城二首

元文類作
竹枝歌

城南牡丹一百本翰林學士走馬來渡水楊花逐飛燕

蘄中芳草送春迴

一作翦衣雪
影覆春臺

粟侯亭前

一作
宅中

花一園客來日日

一作
飲酒

費金錢明朝碧

樹春城合恨不江東問酒船

京城南粟侯玩芳亭
仲淵子於同賞牡丹

驪山二首

繡嶺春來綠樹圓東風吹影入溫泉華清夢斷飛塵起

玉鴈銜香墮野田

玉女泉邊翠藻多石池涵影媚宮娥可憐繡嶺嘯春鳥
猶似梨園弟子歌

河湟書事二首

陰山鐵騎角弓長閒日原頭射白狼青海無波春鴈下
草生磧裏見牛羊

波斯老賈度流沙夜聽駝鈴識路賒採玉河邊青石子
收來東國易桑麻

七夕舟中苦熱

嘗憶銀牀桐泣露更思玉腕蔗流漿天孫初嫁龍綃薄
却恐秋河入夜涼

戲馬臺

將軍一叱靡

一作廢

千人未可掀髯便笑秦枉築高臺閒

戲馬漢王將地擬功臣

春日即事

梨花白罷海棠紅誰爲韶光次第工小閣卷簾春事晚
佇看蝴蝶過庭東

送胡古愚還越二首

越江秋水得霜清
夜夜天南婺女明
客子布衣風又急
世間無用是才名

送客歸山天正霜
吳江蟹美橘初黃
上林千樹櫻桃熟
莫戀金華是故鄉

過故相宅

瓦墜當簷燕不來
白頭老妾賣花栽
舊時小吏今身貴
羞近門西上馬臺

閩浙之交三首

閩嶠人居罨畫圖
客行只欲望京都
筍輿軋軋相思嶺
秋雨空濛叫鷓鴣

路入閩中盡翠微
家家蕉葛作秋衣
石牆遮竹松圍屋
時有丹禽哺子歸

山溪秋瀨急飛淙
萬斛跳珠濺石砮
閩女唱歌來漂苧
素馨花插髻了雙

詭燕

風雨池塘鬪頡頏
春來秋去一生忙
世間多少寬閒境
辛苦營巢傍屋梁

五月芍藥

紅芍花開端午時
江南遊客苦相疑
上京不是春光晚
自是天家日景遲

潘居士施飯

飯飽千僧洗鉢歸
生臺飢鳥拂簷飛
山中文室維摩病
獨向長松挂衲衣

駿馬圖

天馬西來入帝閑
風駿霧鬣駁文班
房星一夜光如水
却怨龍媒萬里還

貢院次曹子真尚書韻二首

杏園三月換銀袍
燕子西飛背伯勞
賦罷長楊傳唱急
天門金榜日華高
紅綾餅餠出宮闈
賜宴恩榮玉殿西
白髮詞臣曾射策
榜名欣見武都泥

和史參政韻

一作殿試和
李參政韻

五雲天近晝香殘
紅白花枝滿藥闌
一夜東風吹小雨
殿頭持卷隔簾看

丁卯上京四絕

山雨晴時已是秋
苑中行殿日華浮
長楊十里旌旗宿
不使飛霜入畫樓

離宮秋草仗頻移
天子長楊羽獵時
白鴈水寒霜露滿
騎奴猶唱踏歌詞

海國名鷹豈鶻胎
渥洼天馬是龍媒
明時不惜黃金賜
只欲番王萬里來

持橐詞垣已賜金
對衣侍拜更恩深
何如坐索長安米
只有詩歌滿翰林

御溝春日偶成二首

御溝春水曉潺潺
直似長虹曲似環
流入宮牆才一尺
便分天上與人間

水南沙路雨清塵
桃李花開蛺蝶春
三月京華寒食近

東風十里酒旗新

趙中丞折枝圖

洛陽春雨濕芳菲萬斛臙脂染舞衣
帳底金盤承蜜露

東家蝴蝶不須飛

牡丹

乘槎使者海西來移得珊瑚漢苑栽
只待綠陰芳樹合

蕊珠如火一時開

石榴

館娃宮裏醉西施不覺秋生水殿時
酒病却嫌丹粉惡

洗妝天上影娥池

芙蓉

火齊珠紅拂翠翹石家步障曉寒消
千枝蠟炬燒春夜
羯鼓催花打六么 山茶

代悼亡為陳云嶠作

燕子樓空花不開繡簾天晚月初來
手痕留在紅牙板
猶有餘香妬落梅

次王參政延福宮韻二首

蕊珠宮闕畫雲扉么鳳桐花白日飛
冰水藕絲清暑宴
偷桃方朔醉忘歸

唐家漲水望雲亭三月千花隔障屏不似仙人華綠洞
雙笙吹鳳五芝庭

題吳娃圖二首

金蓮燭下看蛾眉應是吳王半醉時一自館娃宮壞後
仙魂都上落花枝

千兩金盤浴小兒玉釵雙墮燕差池繡窻白日無針線
却笑羅敷不畫眉

吳宗師送牡丹

十五年前花發時
仙翁邀賞醉瑤池
如今頭白無情思
只見瑤池花滿枝

楊邨

霜明野水曉粼粼
蘆葉黃時少白蘋
船上忽逢吳客子
牽衣雙手拂征塵

絕句

一春不得見花開
何況飛紅墮酒杯
今日城南花萬樹
看花不肯放春回

絕句七首

吳王蓮宮夜張樂急管哀絲翠簾幕可憐西子眉少顰
坐使長洲百花落

天上冰蠶白雪絲裁成紈扇好題詩南風恰住西風起
莫道班娘有怨詞

初嫁郎時正盛年畫眉塗頰鬪嬋娟只知百歲專房寵
誰料君恩不似前

江南女兒年十五兩髻了了面粉光小紅船上採蓮葉

北客初來應斷腸

盈盈小客抱琵琶
歌舞王孫帝子家
彈得開元教坊曲
金錢還只當泥沙

翡翠明珠載畫船
黃金腰帶耳環穿
自言家住波斯國
只種珊瑚不種田

甬東賈客錦花袍
海上新收翡翠毛
買得吳船載吳女
都門日日醉春醪

寄示男武子

爛熳天孫織錦機
春風吹雨洗芳菲
香泥滿地臙脂濕
只許新來燕子飛

桃花馬

白毛紅點巧安排
勾引春風上背來
莫解雕鞍橋下浴

一作洗
恐隨流水泛天台

南方賈客詞

江岸琅玕悲帝婦
雲光漏日波含霧
瀧船春下鷓鴣林
青幘蠻郎占龍戶
千尋高杉生翠微
北人去買椒葛衣

雞骨卜神銅鑄鼓却意水紈將北歸

踏水車行

松槽長長櫟木軸龍骨翻翻聲陸續父老踏車足生繭
日中無飯倚車哭乾田犂确穉禾槁高天有雨不肯下
富家操金射民田但喜市頭添米價人生莫作耕田夫
好去公門為小胥日日得錢歌飲酒朝朝買絹與豪奴
識字農夫年四十脚欲踏車脚失力宛轉長謠卧隴

一作

隴畝間誰能聽此無悽惻

繅絲行

繅車軋伊繭抽絲桑薪煮水急莫遲黃絲白絲光縱縱
老蠶成蛹啖兒飢田家婦姑喜滿眉賣絲得錢買罽毼
翁叟慣事罵婦姑只今長男戍葭蘆秋寒無衣霜裂膚
鳴機織素將何須翁叟喃喃罵未竟當門叫呼迎縣令
騶奴橫索馬鞭絲婦姑房中拆纒經

拾麥女歌

壟雉飛桑扈鳴老蠶入簇繭欲成原頭腰鎌者誰子刈

麥歸家作餅餌心知棲畝有滯穗惻惻忍收寡婦利寡
婦持筐衣藍褸終朝拾麥滿筐管兒嗁婦悲竈無火寒
漿麥飯晡時取豈不見貴家妾豈不知娼家婦繡絲繫
襦蓮曳步銀刀鱸魚佐酒杯狎坐酣歌愁日莫拾麥女
拾麥女爾莫嗟爾莫憂人生賦命各有由前年貴家妾
籍入為官婢今日娼家婦年老為人棄貧賤艱難且莫
辭畢竟榮華成底事

古樂府

天上雲片誰翦裁空中雨絲誰織來
蒺藜秋沙田鼠肥
貧家女婦寒無衣女婦無衣何足道
征夫戍邊更枯槁
朔雪埋山鐵甲澀頭髮離離短如草

河西歌效長吉體

賀蘭山下河西地女郎十八梳高髻
茜根染衣光如霞
却名瞿曇作夫婿紫駝載錦涼州西
換得黃金鑄馬蹏
沙羊冰脂蜜脾白箇中飲酒聲澌澌

淮南田歌三首

東塘水初滿西塘泉又生春風兩塘側多少路人行
蒲生亦有筍菰生亦有米可憐芙蓉花照影秋塘裏
借錢買鹽茶倩人時早秧日望秋田熟仍防野鴨傷

淮南漁歌三首

棹船淮水上曬網赤岸南船中捕來魚賣錢買魚籃
小艇如鳧鷖湘東柴杉木載家復捕魚夜夜繫江竹
渡江問魚價人來索酒錢婦姑亦不惡便煮縮項鱖

和王左司柳枝詞二首

郎君巧歌楊柳枝
柳眉初出學月支
隋隄千樹煙光莫
不如柳眉初出時

鳳城三月草色青
池塘飛絮相飄零
風吹宛轉低撲人

長空

一作天

白日流榆

一作疎

星

和王左司竹枝詞二首

日邊寶書開紫泥
內臣珠帽輦步齊
君王視朝天未旦

銅龍漏轉雞人

一作金雞

曉

金鑪寶熏留篆雲
花間百舌鳴

一作曉

早春五坊戲馬賽

爭道傳聲

一作宣

催賜十流銀

西湖竹枝詞序云中丞詩名敵虞王西夏氏之詩振

始于石田集也竹枝蓋和繼學之作其音格矯健類山谷老人

北歌行

君不見李陵臺白龍堆自古戰士不敢來黃雲千里鴈
影暗北風裂旗馬首回漢家衛霍今何用見說軍還如
裹痛不思百口仰食恩豈念一身推轂送如今天子皇
威遠大磧金山烽燧鮮却將此地建陪京灤水回環抱
山轉萬井喧闐車夏輪翠華歲歲修時巡親王覲圭荆

玉盡侍臣朝紱蠙珠新高昌句麗子入學交趾蠻官貢
麟角斗米三錢金如土國人謳歌將軍樂將軍樂四海
清吾皇省方豈田獵觀風察俗知太平

車簇簇行

李陵臺西車簇簇行人夜向灤河宿灤河美酒斗十千
下馬飲者不計錢青旗遥遥出華表滿堂醉客俱年少
侑杯小女歌竹枝衣上翠金光陸離細肋沙羊成體薦
共訝高門食三縣白髮從官珥筆行毳袍衝雨桓州城

前宛轉曲

紫檀出海南削成琵琶槽上有鴛鴦弦彈曲聲嘈嘈客
問此何聲新聲名絳桃一奏桃始華再奏花枝斜笑靨
頰暈粉仙源飯蒸霞度作新聲曲春樹雙鸞逐雙鸞擲
金梭魚藻蕩圓波陌上行車帶結羅絳桃年少光陰多
蕭姓淵善鼓琴予嘗為之作我思操今自和林
歸再任巡徼之職于江南北行又求予詩遂爲
賦漢銅馬式歌以送之

漢家金銅鑄馬式求馬相比不失一塞上將軍得一足
驕驩如龍高八尺日斜騎出陰山道獵獵霜風鳴淺草
鞍後竝懸雙白狼歸來穹廬月弓好江南綠蕪春接天
只須一抹蹴雲煙摩訶舊是將軍種酒澆青衫學控弦

楊花宛轉曲

空中游絲已無賴宛轉楊花猶百態隨風撲帳拂香奩
度水點衣縈錦帶輕薄顛狂風上下燕子鷺兒各新嫁
釵頭燼墜玉蟲初盆裏絲繅銀繭乍欲落不落春沼平

無根無蒂作浮萍
瀨波繡苔總成媚
人間最好是清明
清明豔陽三月天
帝里煙花市酒船
石橋橫直人家好
小海白魚跳碧藻
榆莢荷錢怨別離
不似楊花宛轉飛
楊花飛盡綠陰合
更看明年春雨時

公子行

綠香繡帳垂流蘇
牀頭三尺紅珊瑚
十八窈窕秦羅敷
曲房小步璫鳴襦
高臺公子吹笙竽
百斛明珠買氍毹
蘭燈桂漿炙文魚
但苦不駐羲和車

擬唐宮詞十首

華清水殿繡芙蓉
金鴨香消寶帳重
竹葉羊車來別院
何人空聽景陽鐘

銀牀井冷露漙漙
半臂熏衣釧辟寒
不恨長門冬夜永
小奴休報鞦韆單

長門月轉漏聲催
自熨寒衣減帶圍
休怕官家嫌體弱
細腰曾是楚王妃

合宮舟泛躍龍池
端午爭懸百綵絲
新賜承恩脂粉磴

上陽不敢妒蛾眉

繭館縑絲濕翠翹
夫人纖指織龍綃
羅襦雙佩清晨響
只恐君王有晏朝

八姨粉翠錫千緡
脂盞新妝百寶勻
白髮上陽宮女老
補衣重拆繡麒麟

卯酒微微解宿醒
催花羯鼓變新聲
君王好賜承恩宴
辛苦邊頭百將營

露蘭研粉壽陽妝
簾內新燒百刻香
圓舌教成鸚鵡語

偷將玉笛送寧王

銀河七夕度雙星
桐樹逢秋葉未零
萬歲君王當寧立

妾身不怨

一作顧

命如萍

花氣蒸霞淑景明
望仙樓上看彈鶯
李暮吹笛宮牆外
學得梨園第幾聲

書上都學宮齋壁

齋居芹宮旁
永日少人跡
清心慕古躅
簡編頗紬繹
徒自傷迷民
位卑力莫及
苟祿亦可羞
吾將反蓬華

集袁王二學士詩爲首二句祖常足成之

石城月落鴉棲堞秋浦天清鴈拂簷春送亂紅浮酒面
山飄空翠濕書籤

鸚鵡聯句同王繼學賦

雕籠居啄桃袷服儀采綠南荒孕靈質西顛發麗曲頸
綬紅縈絲喙棘頰屈玉蓄慧婉含章襍彩粲成縵能言
貫珠舌善舞凌雲躅金眸肖鞬隼珍畜異巢鵠層堦寶
舍利深杯注醽醑流丹曙林度隨翠春洲浴石鏡影毳

魏銅梁步陸續題賦吾豈能入貢爾應錄

都城南有道者居名松鶴堂暇日同東平王繼
學為避暑之遊因作松鶴聯句

偃雲聳層霄驚露落古雪虬枝喜垂澗鷺羽陋鳴垤蟠
石千歲苓頂朱百齡血胎禽哺春巢乳脂凝沍節舞蓋
竽籟喧啄粒苔蘚蓄玄玉熏麝煤碧脰隘雞桀陟岳秦
爵崇授甲衛軒劣沐髮豹霧深引吭鳳竹裂風馭八極
小河舟三翼拙魯縞曳襦褌夏社挺截薛任重明堂材

言歸華表別拳縮包胥立堅剛伯夷烈延世餌方液顧
步炫高潔作室擅茲美觀物入獨閱哲言將束囊書從爾
解珮玦


天慶寺納涼聯句

槐屋夏陰繇石池暑氣清高堂瞰福田邃宇依王城午
磬梵唄集夜廊酥燈明龕經鬱金字壁礎承丹楹寂寂
鴿棲罽宛宛燕穿榮露葵炫晝豔霞藥敷陽英境闌便
靜室心古樂高情逍遙祇園賞迤邐廬社盟山枕藉雲

潤水簞凝冰輕飯盃給香積袈裟褫華纓共忻朋簪合
敢謂詞鋒并睥睨荒草棘橫縱按林垆幽尋振塵鞅雅
談忘飛觥鄙哉何朔飲投憤得世名

元詩選初集卷二十一

謹案第一頁前五行錫喇濟蘇舊作錫里吉思今
改 一頁前六行烏呼訥舊作月合乃今改
一頁後一行特們德爾舊作鐵木迭兒今改



總校官候補中書臣吳紹深
校對官編修臣馬啟泰
謄錄監生臣羅佑湘